

SAVOGNIN

Nov partenari per Sandro Simonet

La mazlarea Peduzzi SA da Savognin davainta nov partenari da nutrimaint pigl skiunz alpin *Sandro Simonet*. La staschung passada n'è pigl atlet ansomma betg marschada scu giavischia: igl sies grond potenzial tgi vign adegna puspe attesto da trenaders ed experts n'ò el betg pudia cumprovar. Siva ena cupitgeida igls 9 da mars 2022 ò Sandro Simonet perfign gia d'interromper la sia staschung. La consequenza: ena blessura digl meniscus. Tenor comunicaziun allas medias è igl skiunz siva l'operaziun digl schanugl an amprema lengia sa deditgia a fatschentas administrativas: «Resulto è tranter oter en nov partenari. La ma legr, da pudeir chintar cun David Steier e la mazlarea Peduzzi SA en ulterieur affar local tigl mies partenaris», uscheia Sandro Simonet. Er da vart dalla mazlarea ins è cuntaint davart igl nov partenari: «Igl è pitost rar, tgi vagn en atlet regional tgi totga tigl miglers digl mond e percheigl ischans fig loschs, tg'el porta igls noss products e la nossa regiun or aint igl mond», uscheia *David Steier*, possessour dalla mazlarea Peduzzi SA. (cdm/fmr)



La mazlarea Peduzzi SA da Savognin cuagl possessour *David Steier* (dretg) davainta nov partenari da nutrimaint da *Sandro Simonet*.

FOTO MAD

LIA RUMANTSCHA

Café rumantsch a Surava

Las puppas da Clara aint igl museum da puppas a Surava èn gio divers onns en'attracziun speziala aint igl Parc Ela. *Clara Farrèr-Pazeller* ò en dung aparti da preschentar mintga puppa tenor caracter e cumparsa. Sia premura e passiu fascinieschan ed anveidan da perscrutar chel mond magic. (cdm/fmr)

La *Lia Rumantscha* anveida agl *Café rumantsch a Surava* – mesemda, igls 18 da matg, allas 16.00 a Surava aint igl museum da puppas.

FMR FUNDAZIUN
MEDIAS
RUMANTSCHAS

«la sung an contact
cun sportistas,
politicthers e persungas
scu te ed ia
dalla nossa regiun.
A me plai igl mix
tranter retschertga,
screiver e produtgier
ena gasetta.»

Sandra Balzer
redactura e producenta




Interess da lavurar per la FMR?

Lura vegni sperasvi en biro u dai in telefon!
Nus avessan grond plaschair.

Fundaziun Medias Rumantschas
Via da Masans 2
7000 Cuira

david.truttmann@fmr.ch
081 544 89 10



A pled è er nia *Leo Thomann*, igl mastral digl cumegn da Surses.



Per la dretga musica tar l'occurrèza ò procuro la Musica instrumentala *Salouf Mon Stierva*.

FOTOS GION NUTEGN STGIER

«La chint betg cun ena ghera totala an Europa»

Grond interess per la radunanza generala da la Federaziun grischuna digl sport da teir a Salouf. Nias an rotscha èn betg angal igls tiradours, mabagn er la prominèza politica era ferm represchentada. Organizada è la radunanza neida dall'Uniun da tiradours Surses e chegl an moda perfetga.

GION NUTEGN STGIER/FMR

Dus onns ò la Federaziun grischuna digl sport da teir gia da renutzgier alla radunanza generala an furma fisica perveia dalla pandemia. Uscheia è igl interess per la 142avla radunanza generala da sonda passada a Salouf sto fitg grond. Preschaints èn stos 130 delegos dallas uniuns da teir e vers 70 giasts anvidos. Darar on tantas persungas dalla politica piglia part ad ena radunanza generala dall'uniun tgi reunescha igls 5000 tiradours da noss cantun. An en colp tanta prominèza politica ò la vischanca da Salouf strousch vasia eneda. Catto la veia an Surses ò er *Aita Zanetti*, la presidenta digl Cunsegl grond. Preschaints eran er igls dus cunsigliers guvernativs *Marcus Caduff* e *Peter Peyer*. Tranter igls giasts eran er igls dus candidats per la regenza grischuna *Martin Bühler* e *Roman Hug*. Vasia ins ò alloura er blers candidats e candidats tgi candideschon per egn digls 120 posts aint igl parlamaint cantunal. Er dalla parteida è sto cunsigliar naziunal *Martin Candinas*. Anvido alla radunanza generala è er sto *Leo Thomann*, igl mastral digl cumegn da Surses. El ò preschento igl cumegn e purschia igl bavegna dall'antiera populaziun.

Gronda solidaritad per la famiglia Wolf da Trun

An sies pled da bavegna ò *Carl Frischknecht*, igl president dalla Federaziun grischuna digl sport da teir, catto igls pi profonds plects da condolientscha per la famiglia *Wolf* da Trun, tg'ò pers igl sies fegl *Silvan Wolf* antras en accident tragic cun en'arma. La solidaritad da vart digls tiradours e da vart da las persungas dalla politica anvers igls pertutgias digl trest accident è stada commoventa all'antschatta dalla radunanza generala a Salouf. L'antiera sala è sa dulzada dallas soptgas per mussar l'attaschedad anvers la famiglia *Wolf* e la vischanca da Trun.

Lod per la furmaziun digls tiradours giovens

Sa drizzada alla raspada da tiradours e represchentants dalla politica è er *Aita Zanetti*, la president digl Cunsegl grond. An sies pled è ella sa dumandada quants *Banadetg Fontanas* tgi detta anc oz? La deputada ò cunzont ludo la furmaziun e scolaziun digls tiradours giovens tgi las uniuns da teir fetschan an moda exemplarica. Els amprenan la relaziun tar l'arma, tge tgi siertad monta, d'aveir pazienzta e d'aveir responsabladad. Er saptga mintgign tge tgi monta da perder e da guadagner. Ultra da chegl fetschan tots participants e participantas digl curs da giovens er ena bunga experientscha tge tgi societad e cuminanza signifitgeschan.

La dretga maseira digl igl

Cunsigliar guvernativ *Peter Peyer* ò scumanzo igl sies pled cun tarmetter alla famiglia *Wolf* a Trun la pi profunda consolaziun. El giaveischa allas familias la duevla forza per survantscher chella plaia, malaveta e dolour. Detg ò el alloura er tgi igl teir vegia blers aspects communabels cun la politica. Er tar la politica dovrigl scu aint igl stand da teir la dretga maseira digl igl, da survantscher seia la pressiu, i dovra bler exercezi e betg igl davos vegia er mintga tiradour da stimar tschertas valours. Tigl teir scu er tar la politica seian en tschert respect indispensabel, confidanza dastga er betg mantger, en manevrar solid cun l'arma totga vetiers ed er la lavour da cuminanza dastga betg mantger, gist scu tar la politica er.

En virus ed er ena ghera ruignan la stabilitad

Divisiunari *Lucas Caduff*, igl cumandant dalla divisiun territoriala 3 ò detg tg'el seia nia gugent a Salouf. Tranter igls tiradours sa catta el fitg bagn. Chels muments an cumpagneia cuagl tiradours totgan tigl bels scu divisiunari. Igl Sursilvan ò detg tg'el en virus ed er ena ghera ruignan la stabilitad d'ena tera, da lour populaziun e da tots pertutgias. El ò er detg tgi

l'armada persequitescha seriousamaint la situaziun an l'Ucraina. Da preschaint chinta el betg cun ena ghera totala an Europa perveia dalla situaziun an l'Ucraina ed an Russia, ò detg igl divisiunari. Tgi dat proximamaint en armistizi crei *Lucas Caduff* er betg.

Filip Dosch per Jöri Kaufmann

La siertad gudogna cun la ghera an l'Ucraina ferm a muntada, ò detg *Martin Bühler*, igl manader digl Uffezi da militer e protecciun civila. El ò detg agls tiradours ed agls represchentants digls cumegns da gio betg sa lascher influenzer perveia dalla polemica pertutgont la protecciun cunter canera tgi seia permanentamaint en tema er aint igl Grischun. *Martin Bühler* ò er detg tgi igl uffizier da teir federal *Jöri Kaufmann* geia chest onn an pensiu. Successour dad el davainta *Filip Dosch* da Cunter. Anc vegia la cunsigliera federala *Viola Amherd* pero da confirmar la tscherna da *Filip Dosch* scu nov uffizier da teir federal pigl Grischun.

Tot vo tenor plan

Cunsigliar naziunal *Martin Candinas*, el tg'è igl president digl comite d'organisaziun dalla Festa da teir federala 2026 aint igl Grischun, ò detg tgi tot geia tenor plan chegl tgi pertotga la planisaziun. I seia sto pussebel da catter persungas pigl comite d'organisaziun da tschep ed er pigls blers ressorts ins vegia gio catto persungas adattadas. Vers la fegn dalla stad ins vigna a contactar las 25 uniuns da teir tg'èn interess da collaborar tar chella occurrèza cun passa 40 000 tiradours e tiradouras. Reeligias an suprananza dalla Federaziun grischuna digl sport da teir èn nias *Rudolf Schwendeler* e *Hubert Tomaschett*. Per *Erika Loretz*, ella tg'è stada igls davos onns scheffa da finanzas dalla federaziun è nia eligia *Luca Bornhauser*. Da chintar ò l'uniun cantunala digls tiradours da perder igls proxims onns a commembers, chegl cun fusiunar adegna daples societads da teir. Da preschaint èn chegl anc 105 uniuns.



Las dus damas d'onour cun las dus donnas tg'on cuschino igl bung giantar. (da san.) *Seraina Jäger*, *Monica Dosch*, *Gilda Jäger* ed *Oriana Jäger*.



Clers plects da divisiunari *Lucas Caduff* per l'armada e pigl teir.